

Edizioni

- letto 534 volte

Fratta

I.

En estiu, qan crida·l jais
e reviu per miei los plais
jovens ab la flor que nais,
adoncs es razos c?om lais
fals?amor enganairitz
als volpillos acropitz:

II.

li sordeior e·il savais
n?an lo mieills e·l meins del fais:
pauc so prezon, qui·s n?irais.
Amarai, mas non puosc mais,
que de tal amor sui guitz
don sai que serai trahitz.

III.

Pres ai estat en caslar,
ab so que no·i aus estar,
e pero non puosc mudar
de mos enemies no·l gar;
ja non serai assaillitz,
q?en auta roch? es bastitz.

IV.

Si·l portiers me vol iurar
c?autre non i lais intrar,
segur poirai gerreiar;
mas al sagramen passar
tem que serai escarnitz,
que mil vetz i sui faillitz.

V.

Lai sui plevitz e iuratz
q?ieu non am ves autre latz,
mas d?aisso es grans pechatz
q?eu am e non sui amatz;

totz temps ai fag plaitz e ditz
per q?eu sui gen acuillitz.

VI.

A Dompnidieu qier solatz
per q?ieu si? enamoratz,
q?en aital hora fui natz
c?anc non puoc amar en patz,
e platz mi car sui issitz
de la terr? on fui noiritz.

VII.

Amor mi lais Dieus trobar
on ia no·m posc afiar,
e qant ieu la tenrai car,
ill pens de mi enganar;
c?adoncs mi tenc per garitz,
qan mi ment tot cant mi ditz.

VIII.

Assatz a a cavalgar
qui la cuid? autra trobar,
c?aissi co·l celz clau la mar,
non pot hom gaire trobar
que non sion camiairitz
vas drutz e vas lor maritz.

IX.

Totz temps deu esser marritz
qui d?atal amor es guitz.

- letto 411 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropaea.let.uniroma1.it/?q=laboratorio/edizioni-140>